



DECRETUM

SALUBERRIMÆ FACULTATIS

IN ACADEMIA PARISIENSI,

SEXTUM circa Criminationem Objectam, Anno posteriori,
Magistro *Carolo Geille de Saint Leger*, Doctore Medico.

Die 4 Julii, 1759.



ANNO Domini septingentesimo-quingage-
simo-nono post millesimum, die autem quar-
to Julii mensis, Saluberrimâ Facultate legi-
timè convocatâ, Doctores, juxta Schedulam
de more delatam per domos ab Apparitoribus, deli-
beratum accesserunt de Libello Supplici, quem Vir Ho-
nestissimus *Ludovicus - Guillelmus Le Veillard*, Regi
ab inferendis ferculis, Facultati dabat, circa iterandum
examen Aquarum è cliyo *Passiaco* Medicatarum, quæ

vulgò recentiores audiunt. Verùm argumento quod fecerat convocandi materiam, neglecto, præfenti faltem horæ particulâ, res, Doctoribus singulis ita volentibus, in Deliberationem derepente missa est, quam hodiernis in Comitiiis agitandam fore nemo præviderat.

Scilicet inter Collegas qui primi Comitiorum Aulam ingressi sunt, indictâ horâ fefqui-decimâ matutinâ, sermo multus erat tristi simillimus, super declinato iterum à Magistro *Carolo-Geille de Saint Leger*, Judicio litis, in quam Saluberrimus Ordo noster adversus eum anno superiori descendebat, hunc in finem, ut honor Accusati Collegæ declararetur in Foro salvus & incolumis; sin minus, inustâ nomini suo labe in detergenda tametsi se totum impendat, infamiæ notam exuere nescierit, se sciret ejectum Asclepiadarum domo & Familiâ, cui dedecori verteret omnium maximo, si turpi consortione suâ foedaretur ulterius. At quoniam ut gravi sic inauditæ apud nos litigationi finis fuerat hoc ipso mane tandem imponendus, non aliter fieri potuit quin Decanus causam exponeret, quare de novo frustra fuerit, assignatus toties à Magistratu, liti componendæ dies.

Enimvero dædaleas ob artes, quibus, proh pudor!, uti amant tam versipellis Collega noster, quàm Defensor uterque, quorum alterius in consiliis, alterius autem in opera, rei suæ Vindicem idoneum nactus est, fucum sic faciunt, ut litis in exitu maturando, quamquam festinanter agere videantur, quasi nervis intenderent omnibus, revera non respiciant ad finem alium, quàm ut ambage post ambagem interpositâ, moras ferendo Judicio nectant omnium maximè diuturnas. Quapropter non antè, quàm hesterno die, prodiit Accusati nomine Libellus duplex, quorum alter Memoria,



lis titulo , projicit ampullas & verba fefquipedalia , dum prosequitur historiam gravis injuriæ , quam illatam à nobis Accusato fingit ; qua de causâ non parùm plecti debeamus. Unde itaque Libellus alter Supplicis nomine , pœnas inter alias , multam ter mille librarum irrogandam Facultati significabat confidentissimè. Quæ cum ita sint , commodum Decano visum est , suæ in accelerando Judicio diligentia si supersederet , usquedum cognosceretur Libello duplici esset-ne aliquid responsi dandum.

Hæc ubi renunciata sunt , supervenit Magister *Jacobus-Francisus Latier* , cui præ manibus erat Libelli Memorialis exemplar , quod non aliunde receptum est , nisi quia (quanta est Æquissimi Magistratûs humanitas !) *Illustriissimo Advocato Regis Catholico* , sic rogato , placuit , ut idipsum quod Accusatus huic obtulerat , ab *Amanuense* statim traderetur , communicationis ergo , Procuratori nostræ Facultatis. Rebus itaque posthabitis quarum occasione Comitia Decanus indixerat , expeditum Saluberrimus Ordo duxit , si Libellus Memorialis in gratiam Magistri *Caroli Geille de Saint Leger* , examini nostro subjiceretur palam & actutum.

Totus ergo quantus erat , Saluberrima coram Facultate recitatus est Libellus viginti - octo paginarum , formæ quam dicunt *in-quarto* , cujus hæc initia sunt , *La vertu même portée à l'excès dégénère en vice ; finis autem , en effaçant de tels Décrets des Registres de la Faculté qu'ils infectent , & où ils seroient un monument éternel de scandale.* De cætero , quominus eadem ambobus appellatio quos Forensis rei cura tenet , *M. Bercher , Avocat* , quod nomen subscriptum ad calcem Libelli legitur , errorem Personæ pariat , scire operæpretium est intelligendum illud esse , de Magistro *Guil-*

elmo-Maria Bercher-Duclos , quatuor circum annos restituto Patronorum Ordini.

Lectiōe peractā , Doctores sententiam interrogati dixēre , defensionem institutam esse , mutato medio. Scilicet pulchre recordati sunt , rem de qua coram Magistratu controversia est , non ampliùs eo respicere , an comparata criminatio sit , quam explorare nostrum fuisset , aut prætermittere ; sed tantummodo verti quæstionem , utrū argumenta quibus in suā defensionem Accusatum uti non puduit , testimonia luculenta sint innocentiae , qualis , ratione sanctitatis officii nostri , tulisse punctum omne censeatur. Negavit Facultas , à qua diffidebat hoc uno capite , quo temporis articulo nos ad Forum appellare male-consultus Collega noster ausus est. Quibus breviter commemoratis , injuriosus ex toto facile videbatur , unanimi consensu , Memorialis Liber , in quem Decanus ideo sic arma tractare jussus est , ut Architectum utrumque convitiosi Libelli , Clientem scilicet ac Patronum , quòd hunc ediderint , certò poeniteat. Etenim homo perditī prorsus consilii siquidem æstimandus est , à quo profecta sit in calumniando protervia quā discindimur , sensit Facultas ultionem in eo versari quæ reos maximè tangat , quibus videtur superesse cum piis probisque species aliqua conjunctionis ac necessitudinis , si facinus quod amborum est , inscriberetur monumento quod palam in civitate , quod ubique , quod semper apponendum esset omnium oculis. Unde itaque Saluberrimus Ordo constituit Magistratum à Decano quantociùs fore salutandum , atque Facultatis invitandum nomine , Libellum convitiosum velit è medio tollere Solemni Judicio , quod mandatum typis audaciam amborum declaret ac turpitudinem.

Interea neutri gloriari ne libeat, quia donec expectatus Judicii dies illuxerit, saltem restat ut indulgeant quantum libitum est, dolis & mendacio quæ datâ operâ Maledico Scripto congesta sunt, singulum sua pœna manet, quam Saluberrimus Ordo voluit ut experiretur, antequam Amplissimo Senatu sic jubente, patiantur illam quæ debetur Calumniatoribus.

Causidicum ergo quod attinet, quandoquidem à contumeliosè dictis quibus obruimur, avocari non potuit nec Fratris Germani gratiâ, cui videlicet Collegæ nostro Facultas caritatis almæ pignora dividit, ob partum nomen ut doctrinâ sic urbanitate conspicuum, nec æqui verique studio juxta quod Vir Jurisperitus tenetur religiosissimè vitam componere; de communi sententia dictum est, Defensoris iniqui pravitatem à Decano fore denunciandam, Academiae nomine, *Consultissimo Patronorum Ordini*, de quo ambigitur utrùm in admiratione potissima sit, quia rebus in angustis Patroni se suâque constanti animo publica pro libertate devovent, an quia nihil est ipsis antiquius, quàm ut delictis suorum severè compressis, si quæ comperta sint, honestatis ac justitiæ, quâ maximè florent, intemerata in laude permaneant.

Quem igitur in finem literis cum hodierno Decreto datis Facundissimo Viro, Magistro *Nicolao - Danieli-Philippo de la Marnière*, quo disciplinæ Consultissimos inter Patronos moderandæ, fortes hoc anno temperantur, curabit Decanus exponere, quàm insanienti libidinis æstu, quantâ veritatis oblivione, quanto despectu pudoris acta sit Magistri *Caroli-Geille de Saint-Leger* defensio, quæ quidem absit ut Collegio nostro stoma-

chum moveat ideo, quia Memoriali Libello, criminis seu suspicione, seu culpâ vacasse dicitur. Enimvero nullus est inter nos cui gratissima non fuisset hujusmodi propositio, quam accipiendam esse pro certa sciret; imò verò candidè profitemur omnes, multo recordationis munere nos obligandos fore Causidico, qui salvâ veritate conclusionem eliceret, quâ planè quidem Accusati contineretur innocentia. Verùm Chartâ Memoriali quia res aliter atque aliter incedunt, non potuit Facultas quin indignè ferret, quòd Scriptor defensionis modum ponere nescius, Clientem excusatum ut habeat, ex industria deblaterare, quinimo debacchari sustinuerit in Academiam, cujus livori (si Libello fides) ac malignitatì jurè quidem ac meritò referantur, quæ damna, quas accusationes innocuus Collega noster expertus est. Proh Deum Immortalem!, itâ-ne civis cujus institutum vitæ genus in custodienda veritate respicit, abduci se passus est à veri rectique tramite, ut crimen ibi nostrum inveniat, ubi est unde Collegii nostri virtus & dignitas laudum incrementa magna percipiant! Itâ-ne dissimulatione Defensoris, an ignorantia factum est, quòd adversari temere videatur institutioni, quam acceptam à Majoribus nemo nescit natam à prima rerum origine, nimirum sic Consultissimo Patronorum Ordini, sic Asclepiadarum genti legem esse sacram, ut unusquisque nostrum audiat integer vitæ scelerisque purus!

Quare tam admirationi quàm tristitiæ locus est, quia Patroni nomine salutatur ille qui Scripto tam injurioso non trepidaverit admoveere calamum. Unde sanè Decanus faciet iterum, Consultissimus Ordo cognoscat, dolore quanto moveamur, non tam quia dictariis nos impugnavit procacibus atque calumniis, Collegæ nostri

Defensor asper & improbus, sed quia calamitatem huiusmodi sentiamus ab illorum consorti & municipe, quibuscum ut antiqua sic læta nobis est consensio studiorum in Patriam ac officiorum; apud quos præclara disciplinæ ratio quam custodiunt exquisitissimè, non finit ut rumor inhonestus de suorum moribus & vitæ proposito quisquis obortus est, vulgi ex opinione linguis hominum ac iudicio traducatur. Quod reliquum est, extremam hoc in passu dabit Decanus operam, velit Consultissimus Ordo cavere, ne quis suorum impunè ferat, si cuiquam contigerit rursus in Facultatem jaculari tela quæ libido, quæ furor insanus acuerit, adeoque toto cœlo distent ab Ordinis utriusque consuetudinibus.

Jam verò nostrum ad Collegam oratione conversâ, subiit omnium animos verecundiæ sensus, quòd Accusati, qui nescit aliter se poenæ subducere nisi quia dolum incedit per iter, debeamus inviti quamquam & pudibundi revelare facinora. Quippe Facultatis in eum indulgentiæ significatio fuerat, ut anno superiori sancitum sit, ne quid vulgaretur ex illis de quibus ipsi coram Magistratu respondendum erit Accusatoribus. Quale propositum Saluberrimus Ordo non mutaret, si strophis tantummodo verbosis, ut solet, Collega noster calumniaretur. At quoniam hominis eo usque crevit audacia, Publico Scripto nobis ut obtruderit consilia sceleratissima, quasi pactum fuisset inter nos, ut illius qui scilicet ἔχει Θεὸς ἐκδίκησιν ὀφείλει vultus immemores & nostri generis, citra rationem aliquam, præterquam perversam animi nostri voluntatem, flagitiis Collegam infimularem, qualia post homines natos iudicio materiam in Foro Medico nondum objecerant; sequitur ut æquanimitati jam aditus intercludatur omnis, sed supersit injuriam forti vindi-

care dexterâ. Quare itaque quem videt periisse cûm perditum ducat, Saluberrimus Ordo voluit ut rerum circa litem hodiernam in Academia gestarum, concinnaretur brevis Historia Gallicè scripta, quæ claustrationibus expers, salibus & jocis, aperto stylo & simplici veritatem nudam exprimeret; cui videlicet defensionis legitimæ modo, gratiæ tantum apud frugi homines ac virtutis inest, quantum requiritur ut fidem amittant calumniatoris Collegæ mendacia.

Quid pluribus? Non latet quidem Academiam in offensa quam intulit, satis superque dari locum, cur ejiciendus homo pellatur è gremio, nullâ deinceps poenitentiae causâ Doctorum Albo referendus. Verum enim verò Judicium quod penes Magistratum est, quominus anteverteretur, poenam quam Accusatus meruit impudentiæ novissimæ causâ, decernendam Saluberrimus Ordo reservavit, arbitrio Senatûs Amplissimi, quem iterum atque iterum deprecatur & enixè rogat, ut litis cui manè finis imponendus erat, prope diem fortiatur exitum. Quo quidem in stadio tametsi moras Adversarius more suo protraheret, vel obsidioni Trojanæ proximas, sciat Collegii nostri Magistros omnes & singulos, eo esse in illum affectos animo, qui flecti nequeat, ut angue pejùs non fugiant consortia Medica repudiando cum homine, quem recordationis æternæ beneficia, quibus à Saluberrima Facultate cumulatus est, non cohibuere ne gladium evaginaret, impio conatu, matris in viscera. Et sit conclusit,

B O Y E R, *Decanus.*